



BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
GRAD SARAJEVO
OPĆINA CENTAR SARAJEVO
OPĆINSKI NAČELNIK

P R A V I L N I K

O RASPODJELI NOVČANIH SREDSTAVA ZA DODJELU JEDNOKRATNE NOVČANE POMOĆI LICIMA U STANJU SOCIJALNE POTREBE

Maj, 2017. godine

Na osnovu člana 15. stav 1. tačka 2. Zakona o principima lokalne samouprave u Federaciji Bosne i Hercegovine ("Službene novine Federacije BiH " broj 49/06 i 51/09), člana 25. Statuta Općine Centar Sarajevo i Odluke o izvršenju Budžeta Općine Centar Sarajevo za tekuću godinu, Općinski Načelnik donosi

PRAVILNIK

O RASPODJELI NOVČANIH SREDSTAVA ZA DODJELU JEDNOKRATNE NOVČANE POMOĆI LICIMA U STANJU SOCIJALNE POTREBE

Član 1.

(1)Ovim Pravilnikom uređuju se kriteriji i način dodjele jednokratne novčane pomoći (u daljem tekstu: jednokratna pomoć) licima u stanju socijalne potrebe.

(2)Pravo na jednokratnu pomoć mogu ostvariti lica čije je prebivalište na području Općine Centar Sarajevo najmanje dvije godine do dana podnošenja zahtjeva ili imaju boravište po osnovu statusa raseljenih lica i izbjeglica u Općini Centar Sarajevo.

(3)Pravo se ostvaruje jednom u toku kalendarske godine.

Član 2.

Cilj pružanja novčane pomoći na osnovu ovog pravilnika je približno dostići minimalnu materijalnu sigurnost i nezavisnost pojedinca i porodice u zadovoljavaju osnovnih životnih potreba.

Član 3.

Sredstva utvrđena na ekonomskom kodu 614200 – grant pojedincima za pomoć socijalno ugroženim osobama, raspoređuje Općinski načelnik zaključkom na prijedlog Službe za rad, socijalna pitanja, zdravstvo, izbjegla i raseljena lica (u daljem tekstu Služba) u skladu sa utvrđenim kriterijima, a na osnovu podnesenih zahtjeva putem protokola Općine Centar Sarajevo.

Član 4.

Socijalnom potrebom u smislu zakona smatra se trajno ili privremeno stanje u kome se nalazi određeno lice ili porodica, prouzrokovano ratnim događajima, elementarnim nesrećama, opštom ekonomskom krizom, psihofizičkim stanjem pojedinaca ili drugih razloga, koji se ne mogu otkloniti bez pomoći drugog lica.

Član 5.

Licima u stanju socijalne potrebe iz prethodnog člana smatraju se:

- a) Korisnik stalne novčane pomoći, korisnik tuđe njege i pomoći i lične invalidnine ostvarene putem Službe socijalne zaštite Općine Centar Sarajevo – Kantonalnog centra za socijalni rad, čiji ukupni iznos primanja domaćinstva ne prelazi 400,00 KM mjesečno;
- b) Osobe s posebnim potrebama kao i osobe nesposobne za samostalan rad, čiji ukupan iznos primanja domaćinstva ne prelazi 400,00 KM mjesečno;
- c) Samohrani roditelji čija se djeca nalaze na redovnom školovanju do 25 godina života, a koji su korisnici dodatka na djecu i ukupna primanja domaćinstva ne prelaze iznos od 400,00 KM mjesečno;
- d) Korisnici dodatka na djecu, čiji ukupan iznos primanja domaćinstva ne prelazi 400,00 KM mjesečno;
- e) Djeca bez oba roditelja ili djeca bez roditeljskog staranja, do navršene 18. godine života odnosno do navršениh 25 godina života ukoliko se nalaze na redovnom školovanju, korisnici su dodatka na djecu, a primanja domaćinstva ne prelaze iznos od 400,00 KM;

- f) Porodilje koje nisu u radnom odnosu u periodu ostvarivanja prava na porodiljsku naknadu, pod uvjetom da ostali članovi domaćinstva u tom periodu nisu u radnom odnosu;
- g) Porodice čiji se jedan član domaćinstva liječi od teške bolesti, a ukupna primanja domaćinstva ne prelaze iznos do 1000 KM;
- h) Stara, bolesna i iznemogla lica starosti preko 65 godina, čiji ukupan iznos primanja domaćinstva ne prelazi 400,00 KM mjesečno;
- i) Penzioneri sa minimalnom penzijom, čiji ukupan iznos primanja domaćinstva ne prelazi 400,00 KM mjesečno;
- j) Lica koja se nađu u stanju socijalne potrebe u slučaju smrti člana užeg porodičnog domaćinstva, čiji ukupni prihodi domaćinstva ne prelaze iznos do 400,00 KM mjesečno;
- k) Lica koja uslijed nelikvidnosti firme nisu ostvarila pravo na lični dohodak u posljednja - tri mjeseca do dana podnošenja zahtjeva, pod uvjetom da su to jedina primanja domaćinstva;
- l) Lica koja su ostvarila pravo na subvencioniranje troškova grijanja domaćinstva ili ostvarili pravo na topli obrok u Javnoj kuhinji, a čiji se punoljetni članovi domaćinstva nalaze na evidenciji Službe za zapošljavanje;
- m) Lica iznad 45 godina starosti koja su nakon dugogodišnjeg radnog staža ostali bez zaposlenja, a čiji ukupan prihod domaćinstva ne prelazi iznos od 400,00 KM mjesečno;
- n) Domaćinstva čiji su svi punoljetni članovi na evidenciji nezaposlenih, i da ukupan prihod domaćinstva ne prelazi iznos od 400,00 KM mjesečno;
- o) Lice starosti preko 65 godina, koje živi u zajedničkom domaćinstvu sa mlađim osobama, i čiji ukupan prihod domaćinstva ne prelazi iznos od 400,00 KM mjesečno.

Član 6.

Pravo na jednokratnu novčanu pomoć mogu ostvariti i lica za koja Služba za rad, socijalna pitanja, zdravstvo, izbjegla i raseljena lica utvrdi da ne spadaju ni u jednu od kategorija navedenih u članu 5. ovog Pravilnika, ali da se ipak uzimajući u obzir cjelokupnu situaciju prikazanu u socijalnoj anamnezi sačinjenoj od strane socijalnog radnika nalaze u stanju socijalne potrebe.

Član 7.

(1) Lica u stanju socijalne potrebe mogu ostvariti pravo na jednokratnu novčanu pomoć u maksimalnom iznosu do 700,00 KM i to kako slijedi:

- a) domaćinstva do dva člana u iznosu do 200,00 KM
- b) domaćinstva do četiri člana u iznosu do 300,00 KM
- c) domaćinstva preko četiri člana u iznosu do 350,00 KM

(2) Iznos jednokratne novčane pomoći utvrđen stavom (1) ovog člana u konkretnom slučaju može biti uvećan do 100 %, u zavisnosti od utvrđenih otežavajućih okolnosti koji dokazuju veći stepen stanja socijalne potrebe a to su: materijalni status, radna sposobnost, starosna dob, stepen invalidnosti, vrsta bolesti, prestanak rada, uvjeti stanovanja i sl.

Član 8.

Ukoliko bude postojala opravdana sumnja da se sredstva jednokratne novčane pomoći neće adekvatno iskoristiti Općinski načelnik može, a na prijedlog Službe, iznos jednokratne novčane pomoći utvrđen članom 7. ovog Pravilnika umanjiti za 50 %.

Član 9.

Pravo na jednokratnu novčanu pomoć mogu ostvariti lica u stanju socijalne potrebe i u sljedećim slučajevima:

- a) Za plaćanje troškova smještaja za domaćinstva u stanju socijalne potrebe koja nemaju riješeno stambeno pitanje, ako posjeduje ugovor o podstanarskom odnosu zaključen i ovjeren od nadležne institucije o korištenju stambenog prostora ili izjavu o podstanarskom odnosu vlasnika stambenog prostora da je izdao stambenu jedinicu (u izuzetnim slučajevima i izjava korisnika ovjerena u matičnom uredu Općine). Novčana pomoć za plaćanje troškova smještaja dodjeljuje se u iznosu do 200,00 KM mjesečno, a maksimalno u iznosu do 1.000,00 KM u toku jedne kalendarske godine i to kako slijedi:
 - domaćinstva do dva člana u iznosu do 600,00 KM
 - domaćinstva do četiri člana u iznosu do 800,00 KM
 - domaćinstva preko četiri člana u iznosu do 1000,00 KM
- b) Za troškove dženaze – sahrane – ukopa, lica u stanju socijalne potrebe koja nemaju bližih srodnika ili ukoliko ih imaju da se i oni nalaze u stanju socijalne potrebe, a da ovo pravo ne mogu ostvariti na drugi način. Po Narudžbi ove Službe nadležna institucija dostavit će fakturu za troškove ukopa koja će se isplatiti u roku do 7 dana od dana dostave.
- c) Za plaćanje učine učenicima osnovnih škola čiji se roditelji nalaze u stanju socijalne potrebe, a evidentirani su kao korisnici dodatka na djecu, isplaćivat će se mjesečno u iznosu od 16,00 KM po učeniku na osnovu spiskova osnovnih škola sa područja Općine Centar Sarajevo koji se provjeravaju od strane socijalnog radnika ove Službe.

Član 10.

Provjeru stanja socijalne potrebe vrši socijalni radnik Službe izlaskom na teren, što podrazumijeva lični uvid u socio-ekonomske prilike domaćinstva, prikupljanje socio-anamnestičkih podataka i izradu socijalne anamneze, nakon čega se upućuje Prijedlog za dodjelu jednokratne novčane pomoći Općinskom načelniku.

Član 11.

- (1) Ukoliko se iz priložene dokumentacije ne može utvrditi da li podnosilac zahtjeva ispunjava uvjete iz člana 5. ovog Pravilnika, Služba može po službenoj dužnosti tražiti i dodatnu dokumentaciju.
- (2) Jednokratna pomoć se dodjeljuje na lični pismeni zahtjev, u skladu sa utvrđenim kriterijima iz ovog Pravilnika.
- (3) O podnesenom zahtjevu nakon utvrđenih činjenica, prijedlog i mišljenje daje Služba, a Zaključak o dodjeli jednokratne novčane pomoći donosi Općinski načelnik.
- (4) Služba će uz svaki prijedlog za dodjelu jednokratne pomoći, Općinskom načelniku predočiti iznos preostalih sredstava za ove namjene, kako bi se obezbjedilo ravnomjerno trošenje sredstava tokom budžetske godine.
- (5) Sredstva će se raspoređivati na osnovu kriterija ovog Pravilnika i na osnovu raspoloživih sredstava u Budžetu za tekuću godinu.

Član 12.

Lica za koja se, izlaskom na teren, utvrdi da su fiktivno prijavljena na adresi stanovanja navedenoj u zahtjevu za ostvarivanje prava na jednokratnu novčanu pomoć neće moći ostvariti navedeno pravo i nemaju pravo na prigovor.

Član 13.

Pripadnici boračke populacije mogu ostvariti pravo na jednokratnu pomoć u skladu sa kriterijima ovog pravilnika pod uvjetom da isto pravo nisu ostvarili putem Službe za boračko invalidsku zaštitu Općine Centar.

Član 14.

U izuzetnim slučajevima za lica i porodice koji nisu obuhvaćeni članom 5. ovog Pravilnika a trenutno se nalaze u stanju socijalne potrebe, Općinski načelnik može odobriti jednokratnu pomoć u iznosu predviđenom članovima 7. i 9. ovog pravilnika.

Član 15.

Na prijedlog Službe Općinski načelnik može jednokratnu novčanu pomoć istom licu ili porodici dodijeliti dva puta godišnje, ukoliko se provjerama iz člana 10. ovog pravilnika utvrdi da se podnositelj zahtjeva nalazi u veoma teškim socio ekonomskim prilikama koje se ne mogu otkloniti bez pomoći drugih lica.

Član 16.

(1) Isplata jednokratne novčane pomoći licima u stanju socijalne potrebe vršit će se putem Službe za finansije uplatom na tekući račun korisnika usluga.

(2) Lica koja ostvare pravo na jednokratnu novčanu pomoć u skladu sa odredbama ovog Pravilnika ne mogu ostvariti pravo na dodjelu stalne novčane pomoći utvrđene Pravilnikom o raspodjeli novčanih sredstava za dodjelu stalne novčane pomoći penzionerima u stanju socijalne potrebe i licima preko 60. godina starosti bez primanja.

Član 17.

Pravo na jednokratnu novčanu pomoć po odredbama ovog Pravilnika ne mogu ostvariti porodice u kojima jedan od članova zajedničkog domaćinstva vlasnik preduzeća ili samostalne radnje ili ima registriranu dopunsku djelatnost, te ukoliko je neko od članova zajedničkog domaćinstva vlasnik ili posjednik motornog vozila.

Član 18.

Ukoliko nisu ispunjeni svi uvjeti za ostvarivanje prava na jednokratnu novčanu pomoć utvrđeni ovim Pravilnikom, podnositelj zahtjeva će biti o istom pismeno obaviješten.

Član 19.

(1) Ovaj Pravilnik stupa na snagu narednog dana od dana objavljivanja na oglasnoj ploči Općine Centar Sarajevo.

(2) Stupanjem na snagu ovog Pravilnika prestaje da važi Pravilnik o raspodjeli novčanih sredstava za dodjelu jednokratne novčane pomoći licima u stanju socijalne potrebe broj: 10-14-4242/16 od 23.01.2017. godine.

Broj:
Sarajevo: 2017. godine.

OPĆINSKI NAČELNIK

Prof.dr. Nedžad Ajnadžić

Napomena:
Pravilnik je objavljen na oglasnoj ploči Općine Centar Sarajevo dana _____ 2017.godine